

Date – 05/05/2025

Time - 18:30 Hrs

HEADLINES

1. Pawl 12 exam result vawiina Mizoram Board of School Education-in a tihchhuahah exam zawng zawng zinga zaa 81.10 an pass.
2. Ni hnih cham turin Union Minister of State for Micro, Small and Medium Enterprises and Labour & Employment Pi Shobha Karandlaje-in Mizoram a rawn tlawh.
3. Pahalgam firfiaka chetna avanga hmalakna kal zelah vawiin khan inhmuhkhawm pawimawh tak tak neih a ni.
4. Union Home Ministry thupek angin civil defence lam inpuahchahna dinhmun hriat nan naktuk Nilaini hian enchhinna mock drill neih a ni dawn.

<><><>

HSSLC RESULT

Higher Secondary School Leaving Certificate (HSSLC) exam result vawiina Mizoram Board of School Education-in a tihchhuahah exam zawng zawng zinga zaa 81.10 an pass a, nikuma pass zat aiin za zela 3.06-in an tam. Vawiina HSSLC Exam result tihchhuah ah hian Science Stream atangin Cynthia Lalhlupuii Shangpliang, St Pauls Hr Sec School chuan mark 500 ah mark 477 hmuin pakhatna a ni a, Cynthia Lalhlupuii Shangpliang hi kum 2023 khan HSLC Exam ah pakhatna a lo ni tawh a ni.

Arts stream atangin Lalrammawii Tochohong, Mt. Carmel School chuan mark 500 ah mark 471 hmuin pakhatna a ni a, Lalrammawii hian a beisei aia a tih that thu sawiin an zirtirtute chungah lawmthu a sawi a ni. Pawl 12 Exam result vawiina tihchhuah ah hian Commerce Stream atangin Kristin Laldinpuii Ralte, Oikos Hr Sec School chuan mark 500 ah mark 470 hmuin pakhatna a ni bawk.

Kuminah hian exam beitu zirlai 12,105 an awm a, Arts-ah tam berin zirlai 8,658 , Science-ah zirlai 2,798, leh Commerce-ah zirlai 649 ten exam hi an hmachhawn a, A pumpuiah exam hmachhawn zat mipa aiin hmeichhia 1015-in an tam zawk a, Pass zat pawh hmeichhia 1035-in an tam zawk a ni.

HSSLC pass thar te hi Distinction-a pass mi 701 an awm a, nikum aiin 62-in an tam a, I Division-a pass mi 3250, nikum aiin 117-in an tlem a, II Division-a pass mi 3970, nikum aiin 445-in an tam a, III Division-a pass mi 1896, nikum aiin 200-in an tam a ni. Science stream chu zirlai pass that berna niin, zirlai zaa 85.63 an pass a ni.

<><><>

MBSE CHAIRMAN

Mizoram Board of School Education Chairman Pu JH Zoremthanga'n kumin HSSLC exama compartment zirlai 91 ten Admission an tlai lohna turin compartment exam buatsaih thuai an tum thu a sawi. HSSLC result tihchhuah a nih velah MBSE Chairman JH Zoremthanga chuan a pisaah thuthar thehdarhtute kawmin he thu hi a sawi a, HSSLC result complaint hun chu result chhuah atanga ni 7 a ni a ti a, Exam zawhnate chu LOTS atangin zaa 50-60 siam a ni a, a bak zaa 40-50 chu Application leh HOTS atanga siam a ni tih sawiin, zirna in hma a sawn zel theih nan HOTS question telh tam tura ruahman a ni a ti a, NEP 2020 zulzuiin subject pakhatna chauh exam that ti duh tan a kum leh nghah ngai lovin Compartmental exam rualin kuminah an exam nghal theih tih a sawi bawk.

<><><>

LSA PROTEST

Lai Autonomous District Council Sorkar thiata, inthlan buatsaih ngiatin vawiin khan Lai Students' Association huaihawtin LADC pisa leh DC pisa kai tur te dan an ni. Students' Association chuan tun thla ni 2 khan thuchhuah siamin Larsap Gen (Rtd) Vijay Kumar Singh hnenah LADC thiata inthlanna buatsaih a nih theih nana hma la turin an ngen a, hemi hmalam pawh hian Governor hnenah ngenna an lo thlen tawh a, an thuchhuahah an ngenna chu Ni 4 chhung a tih hlawhtlin a nih loh chuan Sorkar Pisa te dan an tum thu tarlangin vawiin atang khan LADC Office leh DC Office a kaiturte an dang tan a ni.

Lai Students Association General Secretary Matthew Lalhumliana Fanchun chuan an duh ber chu LADC-a inthlan that ani an ti a, tunhnaia CEM inthlak zing lutuk chu mipuite zahlohna lian tak ani tih sawiin an ngenna chu sawrkarin hriatpui se a ti.

Students' Association chuan LADC ah tun Sorkar Term kal lai ah Sorkar a inthlak nasat vangin eng Party mah rorelna chang tura rin ngam an neih loh avangin Sorkar dinglai thiata, inthlanna buatsaih thuai chu an duh ber a nih thu an sawi.

Hetihlai hian Lawngtlai MNF Dist Hq leh BJP LADC Hq chuan thuchhuah intawm siamin, tuna LSA chet lak danah politician te an inrawlh ngei an ring tih an sawi a, MDC Pu N. Zangura chuan sawrkarna siam thei tura member a ngah tawk thu Governor hnenah a thlen a; he thilah hian Governor hian dik takin rorelna sawrkar kalphung pangaiin a kalpui mai a ni, an ti. Governor hian a thuneihna a pumbilh emaw, dan a palzutna emaw a nei lo a, LADC ah Sawrkarna ngialnghet din anih theihna atana Majority ngah zawk apiangte pawm a ni thin a. Hei hi Democracy kalphung dik tak a ni, an ti.

LSA hmalaknaah hian LSA chhungkua an inlungual ni a sawiin, LSA Gen Hqrs chu LSA Sub-Hqrs te leh LSA Joint Hqrs: -te pawn an thlawp lo an ti a, vawiina Office kai turte an dan na-a sikul chhuak te pawh chu ZPM-MDC nilai sikul naupangte hlir an ni an ti. LSA meuh pawh Politics tuinu-ah an in inhnimlut ta chu a mualpho thlak an ti bawk.

<><><>

UNION MOS

Ni hnih cham tura Mizorama lo zin, Union Minister of State for Micro, Small and Medium Enterprises and Labour & Employment Pi Shobha Karandlaje-I chuan vawiin khan Lengpui Airport-ah a lo thlen hnuin Sihhmui, Sairang leh Ramhluna Prime Minister's Employment Generation Programme (PMEGP) hnuaia a hamthatna dawngte a kawm nghal.

Minister of State chuan Sawrkar laipui ruahmanna hnuaia hamthatna dawngtuten an khawsak dinhmun chawikan nana PMEGP hnuaiah eizawna ngelnghet an nei thei chu lawmawm a tih thu a sawi a. Hamthatna dawngtute hmalakna a zarah eizawna siam belh a ni chu thawktute fakawm a tih thu a sawi a. Thalaite thiamna tipung a, eizawna ngelnghet siam belh zel chu PMEGP thil tum pawimawh tak a nih thu sawiin Sawrkar laipui scheme hrang hrang hnuaia hlawhtlinna changtu leh ram hmasawna thlentunih tum tlat turin hamthatna dawngtute chu a chah a ni. Union Minister of State hian thing mistiri, chhang siam, Handloom, Food Processing leh luhmeh thlangtu, hmathatna dawngtute a kawm a ni.

<><><>

STATE COMMISSION FOR CHILD RIGHTS

Mizoram State Commission for Protection of Child Right, chuan an Chairman, Pu Jimmy Laltnanmawia hovin Kolasib an tlawh a, vawiin khan Kolasib DC conference Hall ah DC Pu Robert C Lalhmangaiha khaihruaiin District Child Protection Committee te leh sawmbik te an thukhawm nghal a ni.

Mizoram State Commission for Protection of Child Rights Pu Jimmy Laltnanmawia chuan sikul kai rual, zirna chhunzawmlo chu an vei hle thu sawiin, policy mumal leh tha tak a awm a pawimawh hle a ni, a ti. School a inzirtirna pawh an vei thu sawiin, school tha leh naupang tana tha a awm zel theih nana hma an lak chhoh zel thu a sawi a.

Kolasib District a POCSO case chu a ngaihmayhawm hle thu sawiin, chutih rualin a langlo ah engemawzah a awm thei a ni a ti a, theihtawp a hma la turin kalkhawmte chu a ngen a . Hemi piahlamah hian Juvenile pawh thuam chak a pawimawh hle thu a tarlang bawk.

He hunah hian Kolasib SP, Pu David H Lalthangliana chuan Child Protection kawngah a police anga theihtawpa DCPO te an thawhpui thu a sawi a, Kolasib District ah pawh Special Juvenile Protection Officer atan SDPO ruat niin, Thana tinah Child Welfare Police Officer an awm bawk a ni,a ti. Hemi bakah hian Kolasib District a naupang laka case an neih hrang hrangte a tarlang a, District Child Protection Unit te nen pawh training emaw inzirtirna Police nen tangkawpa an neih theih chuan a hlawkthlak hle dawn a ni, a ti bawk.

Vawiin thutkhawmna ah hian State Commission For Protection of Child Rights Chairman bakah member te, Coordinator, leh counselor MSCPCR te, District Child Protection Committee member te, District Child protection Unit te, CWC leh Social welfare aiawhte, Police leh sawmbik mi pawimawhte an tel a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

MOCK DRILL

Pahalgam firfiaka chetna thleng avanga hmalakna kal zelah vawiin khan Prime Minister Narendra Modia hoin New Delhi-a a chenna inah National Security Advisor Ajit Doval nen an inkawm.

Vawiin vek khan Union Home Secretary Govind Mohan-a kaihhruaiin ramchhunga state leh UT chief Secretary ten video Conference hmangin Civil Defence Mock Drill neih tur chungchang an sawiho a. He hunah hian Civil Defence leh National Disaster Response Force Director General-te an tel a ni.

Puan tawh angina Union Home Ministry chuan civil defence lam inpuahchahna dinhmun hriat nan state thenkhat chu naktuk Nilaini hian enchhinna mock drill nei turin a ti. Thudawn danin indo thlawhnaa inbeih thula inralrinna Air Raid Sirens hman dan turte leh civil mite leh zirlaite tan hmelma te beihna thlen thula mahni inralrin leh inven dan turte enchhian a ni ang. Hei bakah hian indo thlen thulha harsatna thleng thei hrang hrang kawlphehta chhia avanga buaina leh hmun pawimawh hum dan turte leh insaseng dan turte pawh enchhin a ni dawn bawk a ni. He mock drill hi ramchhunga indo leh harsatna liantham thlen thula mipuite lo inbuatsaih lawk theihna tura duan a ni.

<><><>

US SPEAKER

United States House of Representatives Speaker Mike Johnson chuan India-in firfiakte a dona kawngah US chuan theihtawpin a tanpui dawn tih a sawi. Nimina Congress-a a thusawiah Spekaer Johnsona chuan India chu US thawhpui pawimawh tak anih thu a sawi a. Ram pahnih inkara insumdawn tawinna tur inremna pawh an hlawkpui hle dawn tih sawiin ram pahnihten inbiakna an nei chho zel dawn tih a sawi a ni.

Pu Johnson-a chuan mi 26 thihna Pahalgam firfiaka chetna avanga India in firfiakte a beihna kawngah President Trump-a sawrkar chuan a thawhpui zel dawn tih a sawi a ni.

<><><>